

ADYAYA I

PURWAKA

1.1 Dadalan Pikobet

Peraturan Gubernur Nomor 20 Tahun 2013 maosang indik basa, aksara, miwah sastra Bali kaicen ring samian jenjang pendidikan dasar miwah menengah tur kadadosang mata pelajaran wajib ring Provinsi Bali. Kawentenan awig-awig sakadi punika dados sinalih tunggil usaha nglimbakang basa, aksara, miwah sastra mawit saking sekolah, nanging ring pamarginyane peplajahan aksara Bali durung prasida karesepin becik olih para siswa mawinan aksara Bali karasayang meweh antuk kaplajahin. Pikobet indik kawagedan siswa ri sajeroning peplajahan aksara Bali taler kapanggih ring siswa kelas XI MIPA 1, XI MIPA 2, miwah XI IBB 2 SMA Negeri 1 Sukasada. Saking sesuratan watan siswa sane kapolihang manut *Lembar Kerja Peserta Didik (LKPD)* ring kegiatan *Pengenalan Lapangan Persekolahan II (PLP II)* warsa 2022, siswa ring tigang kelas punika kantun akeh sane durung waged nyurat taler ngwacen aksara Bali.

Aksara Bali karasayang meweh antuk kaplajahin mawinan kadasarin olih tata sesuratan sane malianan sareng huruf Latin. Aksara Bali nganutin tata sesuratan *abugida* utawi *alfasilabis* sane madue ceciren aksaranyane marupa wanda (siki aksara nyinahang *unsur konsonan* sane madaging *vokal bawaan* marupa /a/). Imbanyane sakadi ri kala nyurat /sa/. Ring sesuratan aksara Bali, siki aksara sampun nyinahang kalih suara utawi fonem, dadosnyane /sa/ wantah kasurat antuk siki aksara inggih punika ꦱꦱ. Huruf Latin nganutin tata sesuratan *alfabet* inggih punika tata sesuratan sane genah sesuratannyane ring *garis lurus (linear)* tur siki huruf

nyinahang siki suara utawi fonem. Ri sajeroning nyuratang huruf Latin taler nenten kabanda antuk uger-uger sakadi aksara Bali sane kabanda olih Pasang Aksara Bali. Akeh para sisia sane durung prasida minayang tata cara nyurat makakalih aksara punika, dadosnyane iwang ri kala nyurat taler ngwacen aksara Bali.

Manut sakadi tata sesuratan *abugida* utawi *alfasilabis*, aksara Bali kasurat ring genah *vertikal* miwah *horizontal*. Imbanyane sakadi kruna /agustina/ utawi ring aksara Bali kasurat ꦱꦸꦁꦸꦁꦸꦁꦸꦁ . Ring sesuratan punika, aksara ꦱꦸꦁꦸꦁꦸꦁꦸꦁ magenah ring genah *linier* tur dados aksara utama. Aksara sane magenah ring rong *vertikal* inggih punika pengangge suara ꦱꦸꦁꦸꦁꦸꦁꦸꦁ miwah gantungan ꦱꦸꦁꦸꦁꦸꦁ . Pastika akehan para sisia sane meweh nyuratang pengangge aksara sane magenah ring rong *vertikal* mawinan kantong biasa nyuratang huruf Latin sane samian fonemnyane kasuratang ring *garis lurus (linear)* kemanten.

Yening para sisia rumasa kantong meweh malajahin aksara Bali, pastika para sisia nenten seneng nyarengin peplajahan aksara Bali. Parindikan punika prasida ngawinang usaha nglimbakang aksara Bali nenten prasida mamargi antar. Sakadi sane sampun kaaptiang, para sisia mangda ngresepin indik basa, sastra, miwah aksara Bali raris prasida sareng ring usaha ngrajegang budaya Bali. Ngrajegang basa, sastra, miwah aksara Bali prasida kakawitin olih sisia antuk malajah ngwacen tur nyuratang aksara Bali. Antuk punika, peplajahan ngwacen miwah nyurat aksara Bali sepatutnyane kadasarin antuk tata cara sane dangan antuk karesepin sumangdena pikobet indik peplajahan aksara Bali punika prasida katepasin.

Rikala ngawitin malajah ngwacen ring sekolah dasar pastika para guru ngicen imba-imba kruna sane kakepah dados wanda (*suku kata*). Wanda kruna wantah

kawangun antuk kalih kantos tigang huruf kemanten, dadosnyane para sisia dangan antuk manggihin huruf-hurufnyane tur dangan antuk kawacen. Wanda ring huruf Latin sane taler kawastanin *silabel* kapolihang saking *puncak kenyaringan bunyi* ring krana. Ri kala malajahin aksara Bali taler prasida nganggen tata cara kadi punika mangda sisia dangan antuk manggihin aksara ri kala ngwacen tur nyurat aksara Bali, napi malih sesuratan aksara Bali nenten madaging *spasi*. *Puncak kenyaringan bunyi* ring aksara Bali nenten prasida kapolihang langsung mawinan kabanda antuk uger-uger sesuratan, antuk punika aksara Bali kapunggel antuk *blok* aksara. *Blok* aksara inggih punika wates utawi paletan saking aksara sane kabanda antuk uger-uger. *Blok* aksara taler kawastanin *silabogram*. Saking imba krana ‘Amanda’ *silabel fonologisnyane* inggih punika /a.man.da/ tur *silabogramnyane* inggih punika <a.ma.nda> utawi |ᬓ|ᬫ|ᬢ|ᬫᬢ|. Ring sajeroning *silabogram* punika, *fonem* /nda/ magenah ring siki *blok* sane pateh mawinan gantungan <da> kaanggen mademang *vokal inherent* (-a) saking aksara <na>. Antuk punika, ring tetilikan puniki pacang kaselehin *blok* aksara saking sesuratan wasan sisia raris karereh indik blok simbolnyane mangda pikolihnyane prasida ngicen gegambaran indik konsep *blok* simbol sane prasida mawiguna ri kala malajah ngwacen miwah nyurat aksara Bali.

Tetilikan puniki nenten ja dados tetilikan kapertama sane nilikin indik *pemetaan blok* aksara Bali. Sampun wenten tetilikan ngeninin parindikan sane pateh. Sane kapertama tetilikan saking Riawati (2021) sane mamurda “*Kemampuan Memetakan Bentuk Aksara Bali ke Huruf Latin Siswa Kelas 4 dan 5 SDN 2 Kalibukbuk*” nlatarang indik kawagedan *pemetaan* nyurat aksara wresastra, pengangge aksara, miwah gantungan miwah gempelan. Sane kaping kalih tetilikan

saking Pramita (2022) sane mamurda “*Seseleh Wangun Blok Aksara Bali miwah Wangun Dasar Sajeroning Lema Kamus Maaksara Bali-Latin*” nlatarang indik rupa *blok* aksara miwah wangun dasar ring Kamus Maaksara Bali-Latin.

Tetilikan kapertama nilikin indik *pemetaan* aksara Bali miwah pikolihnyane nlatarang indik kaiwangan sajeroning kawentenan sesuratan aksara Bali. Sane pateh sajeroning tetilikan puniki inggih punika nilikin indik sesuratan aksara Bali nganutin *pemetaan* aksara Bali. Sakewanten tetilikan puniki pacang nlatarang *pemetaan blok* aksara Bali saking sesuratan watan para sisia sane pikolihnyane kaaptiang prasida ngicen pangresep indik kaiwangan sesuratan aksara Bali nganutin *informasi fonologisnyane* taler prasida ngicen imba saking kaiwangan sane sering kapanggih ring sesuratan aksara Bali. Tetilikan sane kaping kalih punika pateh nyelehin indik rupa *blok* aksara nanging ring tetilikan puniki pacang kategasang malih indik pabinayan konsep *silabogram* miwah *silabel fonologis*. Madasar antuk punika kalaksanayang tetilikan sane mamurda “***Seseleh Pemetaan Blok Aksara Bali Ring Sajeroning Sesuratan Watan Sisia SMA Negeri 1 Sukasada***”.

1.2 Ngrereh Pikobet

Manut dadalan pikobet ring ajeng, prasida kauningin makudang-kudang pikobet sane prasida kapanggih minakadi, (1) Aksara Bali kocap meweh antuk kaplajahin, (2) Kawentenan tata sesuratan *huruf Latin* miwah aksara Bali sane dahat mabinayan, (3) Sisia akeh sane durung waged ring peplajahan aksara Bali, miwah (4) Durung wenten pangweruhan indik *blok* aksara Bali sajeroning peplajahan aksara Bali ring sekolah.

1.3 Ngwatesin Pikobet

Ring tetilikan puniki pacang kaselehin malih pikobet sane sampun kapanggihin. Pikobet punika pacang kawatesin mawinan kabanda antuk galah taler mangda prasida ngicen galah majeng ring panilik lianan mangda prasida nyangkepin tetilikan puniki mangda sida paripurna. Malarapan antuk punika, pikobet sane pacang katelebin ring tetilikan puniki inggih punika indik seseleh *pemetaan blok* aksara Bali saking sesuratan krana panyusun wasthan sisia, miwah pabinayan saking wangun *blok simbol* sane kasurat olih para sisia miwah wangun *blok simbol* sane anut.

1.4 Bantang Pikobet

Malarapan antuk dadalan pikobet ring ajeng prasida kapolihang indik bantang pikobet sane mapaiketan sareng tetilikan puniki inggih punika sakadi:

1. Sapunapi seseleh *pemetaan blok* aksara Bali ring krana panyusun wasthan sisia?
2. Sapunapi pabinayan saking wangun *blok simbol* sane kasurat olih para sisia miwah wangun *blok simbol* sane anut?

1.5 Tetujon Tetilikan

Malarapan antuk bantang pikobet ring ajeng prasida kapolihang indik tetujon tetilikan puniki inggih punika:

1. Nyelehin *pemetaan blok* aksara Bali ring krana panyusun wasthan sisia.
2. Nyelehin pabinayan saking wangun *blok simbol* sane kasurat olih para sisia miwah wangun *blok simbol* sane anut.

1.6 Kawigunan Tetilikan

Tetilikan puniki kaaptiang mangda prasida ngicen kawigunan majeng ring sang sane ngwacen. Kawigunan tetilikan puniki kakepah dados kalih inggih punika kawigunan pamucuk miwah kawigunan panglimbak.

1.6.1 Kawigunan Pamucuk

Tetilikan puniki kaaptiang prasida ngicen paweweh antuk pangweruhan indik aksara Bali sane kadasarin antuk teori tata sesuratan *abugida*. Tetilikan puniki prasida ngicen gegambaran indik kaiwangan sesuratan aksara Bali nganutin *informasi fonologisnyane* taler prasida ngicen imba saking kaiwangan sane sering kapanggih ring sesuratan aksara Bali

1.6.2 Kawigunan Panglimbak

1.6.2.1 Majeng ring sisia SMA Negeri 1 Sukasada

Pikolih tetilikan puniki kaaptiang prasida dados *evaluasi* majeng ring sisia SMA Negeri 1 Sukasada indik sesuratan aksara Bali saking wasan jangkep sane sampun kapupulang miwah mangda prasida nincapang pangweruhan indik materi aksara Bali.

1.6.2.2 Majeng ring guru

Pikolih tetilikan puniki kaaptiang prasida dados *referensi* majeng ring para guru indik peplajahan aksara Bali sane ngawigunayang konsep *blok simbol* pinaka dasar nyelehin kaiwangan sesuratan sisia manut *informasi fonologisnyane* sane prasida kaanggen nincapang pangresep indik materi aksara Bali.

1.6.2.3 Majeng ring pangurati bahasa Bali

Pikolih tetilikan puniki kaaptiang mangda prasida dados *bahan bacaan* sane ngicen pangweruhan anyar marupa *blok simbol* utawi *informasi fonologis* sane prasida kapolihang saking sesuratan aksara Bali.

1.6.2.4 Majeng ring panilik sane lianan

Pikolih tetilikan puniki kaaptiang mangda prasida dados *referensi* majeng ring panilik sane lianan sane meled nilikin indik aksara Bali sane utamanyane ngeninin indik *pemetaan blok* aksara Bali.

